

На Велицей вечерни

стихологисуем, Блажен муж: 1-й антифон.

На Господи возвах, стихиры на 8. Глас 6: самогласны. [Сергия патриарха:]

1. Стих: Из глубины возвах к Тебе, Господи, / Господи, услыши глас мой.

Днесь иже на разумных престолах почиваяй Бог, / престол свят на земли Себе предуготова, / утвердивый мудростию небеса, / небо одушевленное человеколюбием содела: / от неплоднаго бо корене / сад живоносен израсти нам Матерь Свою, / Иже чудес Бог и ненадеющихся надежда, // Господи слава Тебе. [Единожды]

2. Стих: Да будут уши Твои / внимлюще гласу моления моего.

Сей день Господень, радуйтесь людие: / се бо света чертог / и книга слова животнаго из утробы произыде, / и яже к востоком дверь рождшия, / ожидает входа Святителя Великаго, / Едина и Единого вводящи Христа во вселенную, // во спасение душ наших. [Единожды]

3. Стих: Аще беззакония назириши, Господи, Господи, кто постоит; / яко у Тебе очищение есть.

4. Стих: Имене ради Твоего потерпех Тя, Господи, потерпе душа моя в слово Твое, / упова душа моя на Господа.

Аще и божественным хотением / светлыя неплодны жены прозябоша, / но всех Мариа рожденных боголепно превозсия: / яко от неплодныя преславно рождшия матере, / породила плотию всех Бога, / паче естества от безсеменныя утробы, / едина дверь Единороднаго Сына Божия: / юже прошед заключену сохрани, / и вся мудре устроив, яко весть Сам, // всем человеком спасение содела. [Дважды]

5. Стих: От стражи утренния до нощи, от стражи утренния, / да уповает Израиль на Господа.

6. Стих: Яко у Господа милость и многое у Него избавление: / и Той избавит Израиля от всех беззаконий его.

Стефана Святоградца: Днесь неплодная врата отверзаются, / и дверь девическая Божественная предгрядет. / Днесь плод раждати благодать начинает, / являющи миру Божию Матерь: / Еюже земная с небесными совокупаются, // во спасение душ наших. [Дважды]

7. Стих: Хвалите господа вси языцы,/ похвалите его вси людие.

Днесь всемирныя радости провозвѣщение,/ днесь возвеяша ветри, спасения провозвѣстницы:/ естества нашего разрешается непло́дство,/ неплоды бо мати показу́ется,/ девствующия и по рождестве Зиждите́леве./ Из Неяже чуждее присвоает Иже естество́м Бог,/ и заблуждшим плотию спасение содевает, Христос Человеколюбец, // и Изба́витель ду́ш наших. [Единожды]

8. Стих: Яко утвердися милость Его на нас,/ и истина Господня пребывает во век.

Днесь неплодная Анна раждает Богоотрокови́цу,/ от всех родов избранную/ в жилище всех Царя и Зиждителя Христа Бо́га,/ во исполнение божественнаго смотре́ния,/ имже наздахомся земноро́днии, // и обновихомся от тли к жи́зни неконече́ней. [Единожды]

Слава, и ныне, глас 6:

Днесь иже на разумных престолах почива́яй Бог,/ престол свят на земли Себе предугото́ва,/ утвердивый му́дростию небеса́,/ небо одушевленное человеколюбием соде́ла:/ от неплоднаго бо ко́рене/ сад живоносен израсти нам Ма́терь Свою́,/ Иже чудес Бог и ненадеющихся наде́жда, // Го́споди сла́ва Тебе́.

Вход. Прокимен дне. Бытия чтение. [Глава 28.] Пророчества Иезекиилева чтение. [Главы 43 и 44.] Притчей чтение. [Глава 9.]

На литии

стихиры, глас 1, самогласны. [Стефана Святоградца:]

Начало нашего спасения людие, днесь бысть:/ се бо пронареченная от родов древних, Мати и Дѣва,/ и приятелище Божие, от неплодове родитися происхóдит,/ цвет от Иессеа, и от корене его жѣзл прозябѣ./ Да радуется Адам праотец,/ и Ева да веселится радостію:/ сѣ бо созданная от ребра Адáмова,/ Дщерь и Внуку блажит ѧвственне./ Родіся бо мне, рече, избавлѣние,/ егоже ради от уз адовых свободѹся./ Да радуется Давид бия в гўсли,/ и да благословит Бóга:/ сѣ бо Дева происходит от утробы неплодныя, // ко спасению дўш наших.

Глас 2:

Приидите любодѣвственнии всї,/ и чистоты рачителие, приидіте,/ подыміте любовію дѣвства похвалу,/ от камене твердаго текущий источник жїзни,/ и от безчадствующия купину невещѣственного огня, // очищающаго и просвещающаго души наша.

Глас тойже. [Анатолиа патриарха:]

Что шум празднующих бывает? Иоаким и Анна торжествуют тайно, радуйтесь с нами, глаголюще, Адаме и Ево днесь: яко имже древле преступлением затвориша рай, плод благославен нам дадеся, Богоотроковица Мариа, отверзающи его всем вход.

Пронареченная всех Царица, Божие обителище, от неплодныя днесь утробы пройде, Анны славныя, присносущнаго существа божественное пребывалище: Еюже безстудный ад попрося, и всеродная Ева в твердую жизнь вводится. Той достойно возопиим: блаженна Ты в женах, и Плод чрева Твоего благословен.

Слава, и ныне, глас 8. [Сергия патриарха:]

В благознаменитый день праздника нашего,/ вострубим духовною цевницейю:/ яже бо от сѣмене Давїдова/ днесь раждается Мати Животá,/ тьму разрешающи,/ Адамово обновление, и Евино воззвѣние,/ и нетлѣния источник, тли пременѣние:/ Еяже ради мы обожїхомся,/ и от смерти избавлени быхом,/ и возопиим Той с Гавриилом вѣрнии:/ радуйся Благодатная, Господь с Тобóю, // Тебе ради даруя нам велию мїлость.

На стиховне

стихиры, глас 4, самогласны. [Германа патриарха:]

Всемирная радость от праведных возсия нам, / от Иоакима и Анны всепетая Дева, / яже премногия ради чистоты / храм Божий одушевленный бывает: / и едина воистинну Богородица познавается. / Тоя молитвами / Христе Боже, мир миру низпосли, // и душам нашим велию милость.

Стих: Слыши Дщи и виждь, / и приклони ухо Твое.

Ангеловым проречением, плод пречист от Иоакима и Анны праведников днесь произыде Дева, небо и престол Божий, и приятелище чистоты, радость провозвещаючи всему миру, живота нашего Ходатаица, клятвы отъятие, благословения подание. Тем в рождестве Твоем, Дево Богозванная, миру мир испроси, и душам нашим велию милость.

Стих: Лицу Твоему помолятся / богатии людстии.

Неплоды безчадная Анна, днесь руками да восплещет светло: да светлосыят земная, царие да играют, святителие во благословениих да веселятся, да празднует весь мир. Се бо Царица, и непорочная Невеста Отча, от корене Иессеева прозябе. Ктому жены в печалех не родят чад: радость бо процвете, и живот всем человеком в мире жительствует. И ктому дары Иоакимовы не возвращаются: рыдание бо Анны в радость преложися, срадуйтеся мне, глаголющи, весь избранный Израиль: се бо даде ми Господь одушевленную палату Божественныя славы Его, во общее веселие и радость, и спасение душ наших.

Слава, и ныне, глас 8. [Сергия патриарха:]

Приидите вси вернии, / к Деве тецем: се бо раждается / Яже прежде чрева предвиденная / Бóга нашего Мати, дéвства сосúд, / Аарóнов прозябший жезл от корене Иессеева, / прорóческое проповéдание, / и праведных Иоакима и Анны прозябéние. / Раждается убо, и мир с Нею обновляется: / раждается, и Церковь во свое благолéпие украшается, / храм святы́й Божества приятелище, / дéвственный сосуд, цáрский чертóг, / в немже преславное неизречéннаго соединéния, / сошédшихся во Христе естеств, совершенное содеяся та́инство. / Емúже поклоня́ющеся, // воспевает Девы всенепорóчныя рождество.

На благословении хлебов, Тропарь, глас 4:

Рождество Твое Богородице Дéво, / рáдость возвести всей вселéнней: / из Тебе бо возсия солнце правды Христос Бóг наш, / и разрушив клятву, даде благословéние, // и упразднив смерть, дарова нам живот вечный. **[Трижды.]**